

671.1443  
084  
:8

成安縣志

卷十二下

劉氏諸生張鵠翼妻貞淑寡言笑事姑舅兄姊咸得其歡心鵠翼疾劉左右承順湯藥必親數月無惰容鵠翼死劉盱而號曰天乎吾夫死而無子吾生平何爲姑蔡及其母潘涕泣勸諭劉曰幸有伯叔能事舅姑弟能事父母吾死寧不瞑目乎持其六歲女撫膺大慟慟而哽咽幾死者數矣二母陰令諸姑姊日夜伺之少得間卽自經死時鵠翼死纔三日耳年二十二歲有司上其事奉旨建貞烈坊旌之蔡公可賢表其墓安公謙銘其墓門之石嗚呼劉之死其死而不朽者耶士大夫有食君之祿行君之令而或至懷二心爲異圖者其視此女流何如也

楊氏李宗義妻溫氏李宗智妻二李兄弟也相繼早卒時楊年

十九溫年二十俱無子守志有司表其門曰乾坤正氣冰槩貞心

吳氏喬隆妻年二十二隆死無子止一弟名遠父母憐其少欲令更適吳垂泣曰二親老矣遠尙幼願奉甘旨誓無他心舅姑勉從之吳事親撫叔始終不二後遠亦早卒有遺孤育之如已子竟至成立鄉人評之曰吳氏能守人所難也節而孝且協諸義焉又難之難矣卒年八十有司奏聞表其門曰貞節

何氏張憲妻年二十夫卒遺一子在襁褓間何曰婦道從一而終無子猶不可他適况有子乎吾志定矣遂撫孤堅守年八十  
三歲終有司奏聞表其門曰節照乾坤

喬氏袁希梧妻也希梧年二十六以疾卒喬誓死以殉諸親戚勸解皆不允姑誠曰爾宜死第爾子輪纔六歲二女俱襁褓誰字之者撫遺孤令箕箒有託里中稱爲節婦足矣何必死乎喬乃止勤事舅姑勤紡績外戶不出人罕見其面及昆弟析居家益貧鶴衣糲食人所弗堪喬澹泊自如畧無不愉之色輪五子長魁舉進士授陽曲知縣迎養宦邸年餘病篤歸卒蔡氏知事徐昭妻也昭死無子蔡年已八十有二因自誓曰吾夫居官清苦宜多嗣續今死而無子命也吾當有以酌吾夫遂用麻裙包土築成巨塚朝夕哭奠三年髮白齒落畧似人形里中悲之

喬氏教授宮女也適生員郭維城未踰期維城卒喬年十八無

子欲殉之親族擁護勸慰以翁姑尙在無他昆弟可託與其爲烈何如孝義喬乃揮涕奉養朝暮饗殮俱出一手姑有二女凡百資粧及于歸後供用皆親爲辦治翁憐其孤苦勤劬立族孫文光爲嗣已而姑以無後欲將所有遺產給其所生以喬與嗣子爲贅常不使得飲食時時取給其母家或不繼卽力紡績博半升粟以度一朝姑暮年甚自悔恨鄉約儒學併上其狀太守陳公表其門曰貞節憲使陳公賜以粟帛濟源陳太守亦表其門堂邑張司李表其門苦節凌霜亦有粟帛之惠茹荼五十餘年艱難萬狀其強宗時復憑凌之卒撫嗣子成立可謂完名矣李氏張世祿妻祿卒李方二十二歲紡績事繼姑至孝遺孤甫

周歲李畫荻訓誨後遊邑庠按院錢公旌其門曰栢舟矢節常氏王山妻也居重村年未二十頗有姿流賊至常愴惶逃難遇羣賊逼之義不受辱厲聲罵賊投井死邑侯給穀旌之惜其寒微未得題表

張氏驛丞郝應乾妻也夫卒張年二十四誓以身殉夜於柩前自經其姻屬及姊覺而救之勸曰人生皆有死爾夫天亦命耳必欲相從於地下藐焉三孤依誰撫養年老舅姑衣食又何賴焉恐爾夫亦不瞑目也張乃止孝養二親更慎日夜勤紡績嚴課訓家計稍裕三子皆克振家聲諸孫多列芹序卒年七十有五兩院旌其門曰節孝

張氏中書蔡應龍妻二十七歲應龍卒時參政公可賢柩在庭停應龍於東庭晨昏薦食必先參政公而後及其夫無何子沉亦卒媳李氏方二十一歲遺孤運開甫六齡姑媳撫之邑侯賈公三策扁其門曰雙節保孤馬公珍表其門曰一門節孝應龍姊蔡夫亦亡張迎歸養於別舍奉侍無怠既而李亦卒張隻身撫孤家業凋零堅貞愈勵壽七十四歲終

白氏生員侯之矩妻矩卒白年方十九遺子僅三歲矩前子不才家產蕩費一空逼白改適白誓死不從母子伶仃艱辛萬狀鶉衣藿食無怨也惟紡績伴子讀父書子孫相繼遊泮至今書香不絕卒年八十四歲邑侯彭公希賢據士民呈報兩院有云

處人倫變中之變節傲青霜值家道難中之難心堅白玉按院  
衛公學院霍公扁其門曰節凜冰霜貞操風世

張氏鄉耆名遠女也年十六適郭賓二十而賓卒子定方週歲  
張悲號不食欲以身殉父泣謂曰女不念吾夫婦老年無子乎  
爾翁姑老而且貧乎郭氏一塊肉將何所託乎張乃憐肤曰古  
有割機和丸獨非人婦也能大蘖茹苦以立其孤未亡人又何  
恨焉蔬布勤瘁寄居母家與翁姑隔三十里積有甘美遠供翁  
姑三年無間姑死翁集宗族於堂召二子並張至議將田產鼎  
分輪流供膳張語衆曰將田產讓叔伯獨迎翁奉養衆皆嘆息  
宗長郭士吉謂叔伯曰汝二人分得田產寡婦止分得一老人

耳叔伯慚不答次日奉翁歸孝養備至始終無倦怠意翁嘗摩定項喜曰孫必有成將爲汝母節孝報也翁死祭葬如禮獨力任事定七歲卽授以書嚴課之每述其艱難之狀繼以悲咽定感泣向學青年食餼有文名張翁卒遺庶出一子方二歲一女方四歲加意撫育無異已出俱畢婚嫁庚辰歲大祲收養孀嫂暨孤侄孫輩又減食分賑宗族全活甚衆諸侄貧不能婚者亦爲娶人咸稱其貞孝慈和既能保全郭氏又能保全張氏也紳士里正屢欲上陳張聞亟使子力止之且諭定曰守節乃寡婦之常何旌表爲子能勉學叨一命之榮於門有光予心適矣年七十四歲而終子定歲貢生孫之麟弱冠食餼曾孫繩繩皆能

讀書

張氏保定新安人也爲武進士鉦女適生員李童中子合天因失業避地南行至成安城西居焉合天讀書教授張布衣操作佐之無子一女年十五歸孫奇逢孫溥合天有疾張竭家資延醫求藥療之不足解衣脫簪珥爲用合天卒張哀毀骨立決意自盡勺水粒米不入口五日矣姊姒勸之弗聽其女泣曰父今去世母又欲從天涯孤女何所恃以爲命耶且盡節與守節孰難母讀書以古人自期何不憐女孤苦未成人姑爲其難者乎張曰守節以存孤也不則有舅姑在無人供甘旨求死不得不獲已而爲之者也今我無是雖有女狀已于歸從夫我之事畢

矣與其稱未亡人苟延於世孰如死其女及家人守視之不離  
旦日張謂女曰我夜來思汝言亦有理當爲汝茹苦終身也遂  
稍進湯粥理家事人皆信之厥明失其所在家人奔赴中堂排  
闥入則縊於柩旁死矣比葬邑大夫穎川王公具牲禮往祭贊  
者曰合天夫妻布衣不當拜王公曰李君夫婦道德名節余及  
一邑師也烏可不拜四拜而退報上請旌其節李家貧不能爲  
力事遂寢

楊氏潭河集人生員王受命妻也受命卒楊時年二十四男星  
歲甫八歲女甫六歲楊撫孤事姑不少懈供奉無缺後姑失明  
趨侍愈謹姑卒竭力營葬明末天下大亂盜賊蜂起携子女避

亂城中食藜藿不以爲苦持家勤謹恭儉雞鳴輒起親執爨暇  
則紡績曰我婦人事也閨門嚴肅兒女不許私造飲食鄉俗婦  
女多謁廟看戲楊絕跡不出遇親以禮處族黨以讓至如鄉社  
供祭神祇或祖先春秋生忌蔬果食品必竭誠致辦稍不慊心  
則令勿獻先是母家夫家俱富一錢尺帛不肯妄費後年七十  
子孫嘗以新衣甘旨進輒辭曰我常服適體常食自佳勿以不  
堪強我也當歲歉貧困見子讀書不勤怒曰我在家時見汝外  
祖及諸舅惟讀書是務也到汝家見汝祖父及叔伯亦惟讀書  
是務汝不讀書將欲何爲汝能讀書我貧困無怨汝不讀書卽  
富我不喜也星歲感激向學列諸生讀書不出戶一介不妄取

儒林推之

秦氏陳永壽妻李氏太學生陳王前妻秦氏媳也馬氏太學生  
陳爾學妻李氏媳也三世守節

王氏吳瞳人生員曹日章妻也供養舅姑紡績佐夫讀書日章  
遊泮後家務一切自理不以累日章期以大成日章病卒無子  
家又貧王矢志靡他九死不移親隣有勸其改適者則厲色拒  
之依其侄如璧同居與如璧婦晝夜勤勞以爲生計暇則哭其  
夫今年六十八矣雙目俱瞽有語及其夫者猶呼天痛悼幾不  
欲生也

胡氏逮國顯妻也寡言笑不苟鉛華適國顯善事舅姑明崇禎

十四年春瘟疫舅姑夫俱死胡方二十三歲止一女甫三歲無他親故以紡績爲事三年喪畢父母強之他適女給之曰夫死未久女幼未成一旦他適人有不笑我者乎待女長而後議可也及女旣嫁父母託隣婦言前事婦嘆曰與我比隣數十年猶不量我心乎遂持刀自刺急救之乃以手自毀其面今年六十二歲瘡痕尙存

劉氏世家女邑民張奇抱妻生子爾墓方四歲夫歿氏年二十有一號躡觸棺死死經日而甦嘆曰死則死耳如貌孤何毅然守節教子家貧紡績以給中更流離備嘗艱苦節益勵教益勤致其子爲博士弟子而從容以疾終夫守節難矣守節而教子

則更難守節教子於流離患難中則更難之難若氏者可以風矣崔氏前節婦李氏媳生員張馨繼室宋氏馨子生員爾維妻也守節教子淵源三世馨生一週父世祿死母李氏鞠育教訓弱冠入庠當事業已表其門矣崔撫馨前妻子維如已出亦弱冠入庠維娶宋甫兩載生子闇呱襁褓中維遽逝宋年纔二十歲無何馨又逝崔僅二十有八又號躰稱未亡人矣兩世霜發共撫一藐孤於兵凶患難之中艱苦備嘗慈嚴並至卒玉小子闇於成早食香芹綿清河之祚於不替人咸以爲世凜節操之報云

都氏安起良妻年二十九歲夫亡守節至老縣令馬晃表其門

王氏劉潛妻年十九歲而寡撫孤守節至老縣令馬晃表其門  
池氏苑成維妻母家邢台縣一日歸寧路遇安有民欲污之毆  
傷額顱眼瞽死不從投井死雍正五年題旌

王氏邑庠生楊鴻猷之妻夫亡姑二目雙瞽氏奉侍盡孝撫子  
芸以義方好施予捐貲五百金修本縣儒學雍正十二年題旌

建坊

馮女馮秉信之女許字陳洞未及于歸洞亡卽往哭之絕粒而  
死雍正十三年題旌

侯氏劉其清妻年二十三歲夫亡祖姑劉氏八十三歲氏守節  
孝養乾隆二年題旌

崔氏程爾明妻同里有程偏子者伺氏獨居以戲言挑之氏詈罵不從羞忿自縊乾隆二年題旌

高氏秦法才妻法才他出鄰人申小二突入欲污之氏堅拒投井死乾隆八年題旌

朱氏安辰妻年二十四歲夫亡遺孤甫三月守節撫之成立有司聞之題明旌表建立節孝石坊

侯氏劉清奇之妻賦性聰敏少習女經四書及列女諸篇年二十夫亡守節至七十餘歲邑侯趙元祚聞而旌表焉

秦氏任燦妻年二十歲夫歿無子姑多病織紡奉養年六十而卒邑侯匾其門曰貞節

靳氏監生霍純禧妻年十七歲生子景堯甫三月夫亡撫養遺孤年七十有三邑侯徐表其門曰節並松筠

張氏儒童陳鄖之妻年十七於歸月餘夫中煤毒而死氏卽誓以身殉翁姑痛哭勸諭氏遂毀容截髮納夫柩永無二志年五十六歲奉文題明旌表建坊後不期年而卒

暴氏劉作楫妻年十九歲夫卒事孀姑撫弱子乾隆十三年奉有司題表建坊

郝氏姜中選妻中選幼失恃事繼母如事生母及中選歿氏堅持苦節督學沈旌以貞松慈行

郝氏生員廉楷之妻性和順有節烈楷病氏曰汝死吾卽從汝

死楷歿殮後歸寧卽還俟子安寢從容自盡督學旌其烈載藝術文藝門

厲氏監生任厚澤之妻自二十三歲守寡遺一子嚮撫之成立娶本邑劉氏後嚮亡遺二子長毓桓次毓楠桓娶臨漳縣劉氏楠娶磁州張氏楠婚後夫婦卽亡桓亦不逾年而卒劉氏方二十四歲三世霜居督學贈曰一門苦節

王氏內閣官生樊倫楷之妻二十歲守寡奉養翁姑克盡婦職堅守苦節督學表其門曰玉潔冰清

胡氏宋儀之妻自二十歲孀居撫幼子成立守節五十餘年王氏余之信妻姑病屢藥不效乃割股療之姑獲全無恙

李氏馮貴妻夜被火四隣奔救氏以裸體不肯出其夫赴火援之終不出竟焚死

李氏朱萬妻年十七歲夫亡遺腹生子撫之成立守節四十八年

王氏監生郭璽妻年十九歲夫亡子甫數月矢志守節撫孤成立嘗有盜夜入其室氏攜子執利刃叱曰此寡婦家也賊不敢犯其胆識如此里黨由是愈敬而重之焉

姜氏王秉思妻年二十五歲秉思亡妻守節撫育孤子璋長成娶婦郜氏年二十二歲璋亡郜亦守節姜年八十一歲卒郜年八十二歲卒

李氏監生陳肱妻年二十一歲夫亡守節至六十一年卒

馮氏周繼稷妻年十八稷歿遺腹生子撫之成立守節至老

任氏任明哲妻十九歲夫亡撫孤守節至七十六歲而終

劉氏庠生秦宏基妻年二十歲夫亡守節撫孤翁年七十餘歲病臥不起氏奉事數年孝謹備至里黨莫不稱之

梁氏黑輝妻年二十二歲夫亡撫孤守節至六十八歲而卒

趙氏韓淑文妻年十八歲夫亡遺孤甫數月撫之成立守節至老

王氏翟處仁妻年二十六歲守寡遺孤甫七月撫之成立守節至六十歲

閻氏任世傑妻二十五歲世傑病故閻氏守節至老而卒

侯氏李本立之妻年十八歲而寡守節至老

王氏安澤妻十七歲夫卒還腹生子翁年七十餘歲病臥五年侍奉湯藥辛苦備嘗至八十餘歲卒

王氏溫麟徵妻十九歲夫亡守節至老

任氏郜祥妻二十二歲夫故守節至老

王氏王特拔妻室二十八歲夫亡守節至老

李氏靳君好妻二十歲夫歿守節至老

王氏王之瑞妻二十三歲而寡撫孤守節至老

侯氏庠生王之璧妻二十五歲而寡撫孤守節至老

康氏劉復起之妻夫卒時氏年十八撫孤守節至老

馬氏王源浩妻夫故氏年二十有一遺孤尙在襁褓守節終身  
張女名存姐十七歲被人調姦不從自勒身死乾隆五十四年

奉題旌表建坊

朱氏秦廷選妾因被人強姦不從立時殺死嘉慶四年奉題旌  
表建坊

丁氏監生張作桃之妻監生張文標之母也二十一歲夫亡標  
尙未盈週不逾年翁亦亡氏上事孀姑下撫幼子年五十四而

卒

遜氏監生陳其臘之妻年二十三孀居一子僅四歲事翁育子

終身勤儉親族稱善焉年七十而卒

張氏童生吳瓊妻二十一歲夫卒子女俱無守節終身

程氏宋之屏妻二十歲守寡子廷樞始八月至乾隆五十五年  
考中恩貢時程氏年已八十餘歲其子有祝母壽詩云八十年  
華世所稀而今日喜得慈幃愧無甘旨調三鼎剩有曾孫繞四  
圍百里何妨身仲米一庭常得舞萊衣堂前菽水承歡日遙望

南山聳翠微

武氏霍維周妻姑病夫亦病氏事兩病人始終不忘後夫卒遺  
二孤艱苦備嘗事姑養生送死無不盡禮八十歲學宮獎之八  
十二歲而終

李氏監生霍藩周妻裴氏其子生員思明妻李生思明未週而夫歿李氏二十思明故裴年二十有三無子女姑媳堅志守節李卒年七十三裴卒年八十

李氏趙元善妻年二十二夫亡守節至老

秦氏樊士元妻二十三歲夫亡守節至老

王氏李五鳳妻十九歲夫亡守節至老

李氏程掄元妻年二十七歲夫卒無子奉姑守節至老

吳氏李潭先妻夫亡遺子成甫八歲成娶曹氏成亦亡吳撫媳至七十五歲而終

鄭氏李庭標妻年十九而寡一子僅六月其子至二十餘歲而

亡其孫至二十四歲亦亡氏卒年八十二

馮氏葛明起妻年二十夫亡子僅週歲守節至老

于氏梁文煥妻年二十五夫卒氏欲殉姑泣曰汝死吾二人何人奉養氏乃止姑卒翁又娶張氏性悍氏委曲奉養張亦感悟四十八歲而卒

王氏李作林妻二十三歲寡居無子至七十餘歲而終

徐氏于旭華妻十九歲夫卒家貧撫孤守節至老

王氏師其奎妻年二十三夫卒織紡以奉翁姑撫幼子歷四十

六載

吳氏崔見龍妻年二十四夫亡守節至老

張氏安綸妻生員爾端之母也二十三歲守寡翁姑俱七旬餘爾端甫六月歷四十餘年而卒

侯氏李震妻二十二歲夫亡八十六歲而卒

王氏生員趙鳳翔之繼室劉氏鳳翔弟鳳閣妻張氏鳳翔孫銘妻鳳翔死遺二子含坤含琮俱幼弟鳳閣又死無子王以季子琮奉劉同居守志初氏翁生員麟性嚴峻動繩家人以禮法王劉事之咸得其歡以迄喪葬無少間嚴督二子皆補博士弟子閣學紳士舉王氏督學莊旌以匾曰松筠勁節後復欲舉劉劉曰吾嫂舉卽吾舉也堅辭之琮於劉亦善承色笑母子若忘其爲繼嗣者坤子銘年十八娶張氏僅一載銘遺子甫彌月張年

十八上奉兩祖母下撫藐孤垂三十年成完節而逝

郭氏于大章妻十八歲夫亡遺子鶴甫一歲氏欲矢志殉夫因子未成立乃止及子完婚之後遂自縊

張氏張大奎妻二十二歲夫亡守節至老

孫氏侯建功妻二十四歲夫歿事姑撫孤守節終身

郭氏監生劉文成妻二十五歲夫卒守節至老

樊氏段大成妻康熙辛丑科進士樊正域之孫女年二十二守節無子同孀弟妹撫四齡孤子年六十而終

張氏郭子齊妻年十七夫亡乏嗣撫胞姪簪爲嗣子訓孫綏麟入泮年六十而終

王氏郭履乾妻二十歲夫亡矢志殉夫翁姑勸曰死者固可痛我二老可驟舍乎氏乃止越三月遺腹生子名峻生事親恤孤鄉黨稱孝慈無異詞卒年八十

陳氏李登苞妻十八歲夫亡守節三十八年而終

宋氏王觀會妻十八歲夫亡守節歷年五十有餘

師氏童生遜襄麟之妻年十七孀居子女俱無事舅姑里黨咸稱孝婦無異詞至七十七歲而終

冀氏生員鄆倬之妻也年二十夫亡無子守節至老

李氏鄆廷妻生員鄆居正之母也二十二夫亡居正甫五齡既長娶任氏後亦亡任氏方二十二歲乏嗣姑媳堅守苦節李氏

七十歲而卒任氏現年六十六歲

王氏監生郜僕妻年二十四孀居姑屢病氏左右扶侍朝夕不離親操紡織以撫孤子現年六十五歲

程氏溫際泰妻生員溫獻麟之母也二十二歲孀居麟甫三歲孝事舅姑里黨稱之現年六十九歲

遂氏江華縣知縣遂紳之女黃元士之妻年二十孀居之嗣翁姑俱老事之較夫在更殷現年五十一歲

晉氏梁唐妻二十一歲守寡子女俱無其胞姪襁褓時卽時恃氏撫養不啻己子現年六十一歲

蔡氏王法周妻十九歲夫卒越七月獲一子氏上事翁姑下訓

幼子現年五十三歲

尹氏王新甫妻年二十二夫死奉姑撫孤現年六十歲

馬氏儒童王麒妻夫死氏十八歲姑老子幼氏紡織孝養現年六十六歲

張氏米粟妻夫死年二十四姑老子幼氏養誨維殷子娶董氏年二十四而死董年二十六遺一子董水漿不入口者三日張勸曰爾當法我董方飲食張已沒董現年六十九歲

唐氏儒童馬克溫妻年二十夫死立志殉死族婦交勸乃止現年五十三歲

李氏郭範安妻二十五歲守寡子甫四歲以紡織奉侍翁姑現

年六十八歲

韓氏王行中妻十九歲夫卒乏嗣欲以死殉其姑泣勸乃止現年六十五歲

王氏賈繼堯妻二十一孀居無子事翁姑鄰人咸稱其賢現年六十七歲

喬氏閻起家妻二十歲孤苦守節現年七十九歲

鄭氏張光妻自二十二歲守節現年八十一歲

陰氏吳嗣戴妻年十九夫亡撫孤現年五十五歲

孫氏段大章妻二十一歲守節現年八十歲

韓氏段懷吉妻二十二歲守寡現年六十歲

許氏段擇吉妻二十三歲守寡現年六十五歲

潘氏李逢辰妻二十二歲守寡現年六十七歲

許氏適張二十二歲守節現年六十有餘

郭氏趙士儉妻二十四歲守節家貧奉翁姑以孝聞現年六十  
有餘

靳氏許士璧妻二十二夫卒撫孤守節現年七十歲

李氏王燦妻二十歲守寡生子僅一週越三年姑得癱症氏親  
事湯藥九年現年五十五歲

劉單氏城內十字街劉溥字明德妻本縣西南莊單可舉之女  
也氏早年失恃賦性貞靜寡言笑工針黹勤紡績年十九于歸

劉姓至三十一歲卽亡失所天氏撫遺孤三人辛苦備至又不  
幸次子三子亦早年夭折而長子鳳鳴受氏愛護性敏不學氏  
課責綦嚴弗令失學卒能義方教子使鳳鳴早年入泮氏同寡  
嫂賈氏同理家政井然有條事姑極孝承迎色笑務博歡心鳳  
鳴受母教入泮後又卒本縣高小校及全省警官學校業歷充  
本縣警察敎練所敎練官督察長課長邯鄲縣警察所長平漢  
路貨捐分局局長生女一嫁北漳堡李姓孫二長振武卒中學  
業現任本縣黨部宣傳訓練幹事次炎武本縣高小卒業孫女  
五人長毓秀嫁西彭留村王姓次毓文三毓珂現肄業第五女  
師四毓書現肄業女初級小學五毓藻年方冲齡未能求學氏

守節三十年卒年六十

朱氏王成妻二十三歲守寡子元吉甫二歲與兄嫂同爨後兄嫂歿遺三子俱幼產不足人勸氏析居氏曰姪未成立而析居不義撫育與己子無異十餘年三姪咸爲之婚配皆氏經營也現年六十二歲

張氏薛慕妻十六歲孀居無子現年五十一歲

宋氏侯士欽妻生員侯錫齡之母二十四歲夫卒姑有弱疾氏奉養無怠及姑卒典衣治喪現年七十五歲

高氏趙國玢妻監生趙玉明之母二十二歲守寡明甫二歲事親撫孤現年六十七歲

申氏郭溥妻二十三歲夫亡撫孤守節現年六十二歲

李氏宋大緯妻二十四歲夫卒現年八十二歲

陰氏李文眞妻夫病危謂曰汝年少吾死汝之終身何處乎氏  
泣下曰願從夫死其夫曰家貧母老女方三歲汝死吾母女將  
誰依及夫亡氏年二十一歲卽謹遵夫言矢志冰潔現年五十  
八歲

程氏李能燦妻十八歲夫亡孝事翁姑現年六十七歲

袁氏朱敬妻二十二歲夫亡事翁姑撫幼子克盡孝慈現年七  
十三歲

李氏李玉重妻二十四歲夫卒現年七十一歲

尙氏郭鎔妻自十七歲孀居矢志冰潔歷四十載如一日現年五十八歲

王氏王達妻監生王尊德之母二十六歲守節現年八十一歲  
趙氏生員王孟德妻二十四歲守節現年六十八歲

李氏王智妻生員王儀型之祖母也二十二歲守節現年六十  
五歲

張氏王敬修妻二十二歲夫故撫孤守節現年六十歲

程氏李介妻生員李含章之母十九歲夫歿遺子甫三月子長  
娶高氏入泮後旋亡氏現年六十一歲

張氏霍崇倫妻生子力耕甫三歲崇倫身故氏年二十歲姑老

疾家計無資氏惟紡織奉姑子既長娶妻亦張氏子旋亡姑因思子雙目失明氏每禱神祐至十八載姑目復明如故氏現年六十一歲

孺人姓李氏直隸永年縣歲貢生舉孝廉方正李世馨次女侯選直州判成安縣拔貢黃鶴舉字羽卿繼室翰林院待詔銜恩貢生名金誥繼母也幼事親孝性穎慧善針黹劬於學至老不倦能貫澈史家言暇則爲詩唐宋名人集多窺其門徑稿散佚不具傳僅松筠書屋詩一卷行世年二十五來歸羽卿閱五年羽卿以病卒於家孺人矢殉所天水漿不入置鳩毒欲飲投頸於帛欲絕命數殆金誥數救甦既而曰有母在旦延旦夕勿遽

殞反貽母憂金誥事孺人維謹儒人待金誥如已出金誥病劇爲祈神減算與之得痊其御下也嚴有禮而不酷率家人操作有法門以內肅如也家饒於貲儒人衣必疏布食必麤糲鄉里稱之曰儉生子一甫八歲殤以光緒十六年二月二十四日未時卒春秋五十有三卒時櫛沐端坐顧家人曰死生亦大矣何可苟也其始終守義如此光緒十七年大吏奏節孝以聞請旌其閭制曰可諭曰吾讀柏舟之什而歎生人極至之慘莫此若也若夫拖堅苦卓絕之志貫之數十年雖在士人猶難况婦人乎古所謂之死靡他何以加焉嗚呼世之處安佚而無完行者聞孺人之風可以返矣賜進士出身欽加同知銜成安縣知縣

加五級戚朝卿拜撰

張氏北鄉義村清庠生韓逢春妻辛莊村張學孟女也于歸後事姑嫜以孝聞越七年夫亡無子以姪致和爲嗣撫至二十歲又病歿孫義宗方四歲再撫至二十一歲值同治元年捻匪犯境迎擊之又遇害時曾孫維城僅兩月氏與孫媳郭氏加意教養卒成立仰事俯畜綿延五世勞力勞心筆難罄述守節六十年年八十四卒

郭氏北鄉義村韓義宗妻沙河村郭明女也清咸豐九年歸韓氏時惟祖姑在堂越三年捻匪犯境夫遇害生子一維城僅兩月末幾祖姑歿家無隔宿糧氏以紡織謀生兼撫孤兒茹苦含

辛不可言狀後兒長葬埋祖姑如禮皆氏教養力也卒年八十  
四

宋氏北鄉義村李喜霖之妻廣邑義井村宋氏魁之女也年十七歸李事翁姑惟謹越七年夫早世生子一僅五歲家極貧衣食不給以紡織佐之子稍長教以務農氏於醫頗有心得小兒出痘出疹辨之最精治之亦多效一村中每年所活不可僂指數孫五皆有正業現置負郭田已至五百餘畝

郭氏郎堡生員黃肇渠之妻也生長名門素嫻坤教于歸後六年生女二夫病歿氏志在殉夫不飲食者三日經戚族勸慰並責以奉姑養女義意漸轉然抑鬱在心秋月春花絕不留盼

未幾齋恨以終竟從夫於地下矣清光緒八年生民國四年卒  
劉戴恩妻袁氏肥鄉庠生三綱女年十八于歸越三載夫亡無  
子女事翁姑以孝聞翁歿後家業陵替紡織佐甘旨每食必先  
奉姑數十年如一日守節四十五年卒六十有六族黨立石表  
其墓

馮節婦大金山村李普之妻同邑邑庠生馮全璧之女也幼嫻  
閨訓十七歲于歸善事舅姑賓敬良人僅及五載良人就木欲  
相從於地下念雙親龍鐘三弟幼弱氏節哀慟養舅姑撫幼弟  
未嘗有倦容後值翁姑棄世衣衾棺槨皆氏經理又值年歲屢  
祲家計蕭條氏勤儉度日佐以紡織又與三弟娶妻心力俱盡

卒年六十七

王馮氏肥鄉張耳莊人才德兼全賢名素著年及笄于歸成邑  
王彭留村王泰然生一子印新成未幾夫主見背子亦早逝馮  
哭泣盡哀幾不欲生既而思之翁姑尙在安可無人奉養遂慨  
然以守節孝親爲畢生應盡之天職厥後先意承志曲體親心  
數十年無少懈同治十年請旌奉旨准入節孝祠邑侯王子範

河南鹿邑進士書瑤池冰雪匾額旌其門

遜王氏本縣王彭留村人性情賢淑四德兼優適本邑衙前遂  
聿斌夫主早亡兼無子女王一慟幾絕欲以身殉經本族與後  
親勸慰遂順變節哀撫胞侄岱爲嗣王勤儉持家艱苦備嘗五

十年如一日嗣後孫曾繁衍家業興隆其功洵堪不朽光緒十八年請旌奉旨准入節孝祠鄉人恐其貞節之久而或忘也於是公送匾額題曰金石堅貞

烈婦徐氏邢鄆東里堡人本縣北郎堡李信之妻也年二十有二歸信操井臼勤紡績里閈人多稱道之數年生一女壬戌山左逆匪張錫珠亂畿南烈婦雖貧家女而事親守身舍生取義諸大端亦講之有素比賊距成日近里中婦女皆避去烈婦恐財物損失欲助夫在家守門家人迫之乃亦去賊稍遠皆曰賊不復至矣烈婦遂偕其女以歸甫歸而賊倏至竟被掠詈罵不絕聲賊脅以刃終不懼罵益厲俄宣傳曰官軍至矣賊急去烈

婦反鎖其門急解帶先縊其女然後懸梁自盡時臘月二十四日也烈婦性情嚴厲體素健夫家故業農嘗代夫耕作一如男子信待之亦嚴小有不適輒加鞭楚婦亦不之怨尤閨中所罕見者也

按乾坤正大之氣不沒人寰矣嘗見儒者讀書談道平居講節義等事未嘗不痛快淋漓色飛眉舞也一旦大難陸臨其能烈烈以死者幾人哉徐氏一農家婦耳慷慨捐生毫無依回之念孔曰成仁孟曰取義徐氏固不足當之然世之維風教者不猶賴有斯人歟

王遠氏本邑城內人宅心剛直賦性慈祥適王彭留村文生王

沛然字雨田年二十三歲夫病故遺一子印九成年方四齡遂哭

泣盡哀幾至滅性經親族苦勸遂專心致志以成家教子爲先  
四十年惡衣菲食備極艱辛馴至家業興隆子孫成立其功德  
實不可沒光緒十九年經衆紳合詞請旌奉旨准入節孝祠親  
友公送匾額三方一題畫荻遺風一題金石堅貞一題節勵冰

### 霜

劉氏李家疃人清處士李鳳山之妻生員宗唐之母也祖姑閻  
氏染病床褥淹頓三載有餘氏奉侍孝養終無倦意夏月炎熱  
祖姑移床庭院適大雨驟至氏急抱祖姑還室及回抱子女則  
皆漂溺水道中幾有性命憂氏絕無怨懣意祖姑病篤遺囑家

人曰孫婦事余孝生母恩不是過也吾歿後汝輩皆當善事之尋暝目家人皆羅拜之氏焚化冥鑼哭甚哀嗣有宗唐門人多名恭頌以孝盡祖慈匾額鳳山捐館時氏僅三十餘歲矢志靡他上事翁姑能得歡心教子義方使宗唐早歲游泮享壽八十九宗唐竭力孝養下氣怡聲終身無一拂意事至於捫虱搔癢扶持便溺務得堂上歡心亦如母之事祖姑者古人云非此母不生此子亦天之所以報施善人固不爽也

李鄙氏係李茂林之妻鄙健林之女自二十五歲夫亡守節計守節三十五年

趙王氏係一門兩節王氏係趙長年之妻王治國之女自二十

七歲夫亡守節計守節三十四年孟氏係趙長泰之妻孟存禮  
之女自二十五歲夫亡守節計守節三十四年

遂楊氏係遜箴之妻楊玉昌之女自二十六歲守節計守節四  
十三年

王張氏係王增福之妻張文明之女自二十七歲守節計守節  
三十七年

閻王氏二十一歲孀居子女皆無不數年其夫弟及弟婦均相  
繼歿遺子女各一氏撫育若已出終身貞白族里稱賢享年七  
十八

王韓氏沙河村王維棟妻十八歲夫亡無子氏撫幼女及其姪

使之成立之死靡他清苦歷六十載如一日鄰里罔不稱之年七十七而歿

馬王氏沙河村馬光建之婦也二十歲夫亡有女二家境極貧賴翁舌耕糊口翁竟中年而鰥氏撫女均成人奉翁若生父及翁歲逾耄期氏晝夜侍養意志從無稍懈以故宗族稱其孝鄉黨譽其賢苦志勁節白首不渝卒年六十五歲

李家疃趙氏于蒲成妻夫歿遺一女猶在襁褓中氏撫養嫁人辛苦備嘗守節五十餘年

鐘樓寺王于氏夫歿僅三女氏紡績度日藜藿充飢守節五十

餘年

王氏鄭家莊清文生侯殿邦之祖母也秉性溫良持身恭儉于歸以後家室咸宜老幼皆悅蓋其事翁姑也孝處家人也和故不覺有感而化也不幸二十餘歲其夫侯桂林一病長逝當時氏欲殉夫經多人勸勉未能如願又念雙親在堂二子在抱敬老慈幼分所當然視膳問寢之餘保抱携持之暇紡績針黹勤儉蓄積置地四百餘畝以爲子孫計厥后二子成立兩媳來歸曾幾何時而子孫曾元濟濟一堂非其盛德所致乎至於和睦鄉鄰醫治小兒諸病無不應手取効皆緒餘耳宜其壽享八旬有七無疾而終也

節婦李氏中郎堡馮金璧之妻同邑李明之長女歲貢生李向

陽之胞姊也性貞靜喜讀女訓十七歲于歸事舅姑敬良人實爲閨闥之典則又善女紅翁姑之衣履皆氏任之姑有宿疾病恒兼旬氏奉侍湯藥未嘗一日安枕也操杵臼持內政無不井井姑每與人曰吾之子女不逮新婦多矣繼姑性嚴肅家人動輒得咎氏承望顏色獨能得其歡心小郎三人甫離乳眠食之事與洗濯縫紉悉歸之於氏姑不之間也結褵九載良人就木子女亦相繼殂謝氏誓以死殉夫姑慰之曰吾素昏憤不閭內政汝死家計不免蕭條吾夫與子終歸凍餒矣二事較之孰重無何翁亦棄世子三皆幼弱家政悉委之於氏氏食粗糲衣惡衣甘旨美食悉奉姑與小郎後諸郎相繼畢婚一切事皆氏經

理未及數載婦姑勃谿兄弟闔牆家庭每多鼎沸骨肉幾成參  
商賴氏勸導卒歸雍和氏七十餘歲猶不廢紡織及卒遐邇咸  
曰氏之心血用盡矣雖古之節婦何以加焉

成安縣志

魯昭公

春秋二十有八年春王三月公如晉次于乾侯二十有九年春公至自乾侯居于鄆齊侯使高張來唁公公如晉次于乾侯三十年春王正月公在乾侯三十一年春王正月公在乾侯夏四月晉侯使荀躤唁公于乾侯三十二年春王正月公在乾侯取闕冬十有二月己未公薨于乾侯春秋

先是魯昭公二十七年爲季氏故如齊齊侯饗之使宰獻而請安卑之也子家子乃以君出居于鄆明年春王三月公如晉次于乾侯子家子曰有求於人而卽其安人孰矜之其造於竟弗聽使請逆於晉晉人曰天禍魯君淹恤在外君亦不

使一介辱在寡人而卽安於甥舅其亦使逆君使復於竟而後逆之以是公不得見晉侯仍居鄭焉二十九年復如晉次于乾侯居四年薨于乾侯明年六月喪始返魯九月葬於墓道南孔子之爲司寇也溝而合諸墓

左傳舊縣志

按左傳昭公在乾侯有衛侯來獻乘馬季孫從知伯如乾侯及公疾賜子家子雙琥一環一璧輕服與大夫皆受其賜等事詳矣今祇就公次公在公薨撮其大者記公一人蓋以有公在焉餘子皆不足數也舊縣志論曰一時至止若子家輩不一其人而不盡列統於尊且志客死也烏乎當哉

管輅字公明平原人明易理精於天文風角占相之術時典農  
王宏直遷渤海太守其族兄孝國居斥邱輅往從之與二客會  
客去輅謂孝國曰此二人天庭及口耳之間異變俱起雙魂無  
宅流魂於海骨歸家當並死也復數十日二人飲酒醉共載車  
牛驚皆溺死於潭

魏志列傳

### 孫奇逢

孫奇逢字啟泰保定容城人清初屢徵不起倡明道學海內稱  
爲夏峯先生嘗往來於成安永年諸縣所至講學從游者甚衆  
著述與劉靜修楊椒山同刊名三賢集行於世

廣平府志

### 李童

李童字蔭繩保定新安人倜儻有俊才受業於定興鹿忠節公善繼順治初徙居成安執經問業者無虛日童皆爲闡發開導門弟子隨錄問答之言曰讀書歸要歿葬成安之北原子體天合天明天合天妻張氏死節別有傳

廣平府志參  
舊縣志

華可

華可姓姬氏達摩弟子隋初至成安住匡教寺談無上道四衆歸依聽者林立時有辯和者謗於邑宰翟仲侃加以非法可死投之潭河可忽於水面趺坐瞑目沂流十八里至盧村遂葬焉

唐爲建元符寺

廣平府志  
參指月錄  
舊縣志

呂岩

呂岩字洞賓河中府永樂縣人唐開元七年過成安登鳳凰臺

題西江月一首

見古蹟門

遂西游行邯鄲道中遇盧生爲黃梁夢

以覺之後相傳仙去

舊縣志參  
枕中記

### 路去病

路去病陽平人北齊武平四年擢爲成安令邑在輦轂下舊號難治重以政亂時艱綱維不立功臣內戚請囑百端去病消息事宜以理抗答勢要之徒雖廝養小人莫不憚其風格亦不至嫌恨都下有鄴臨漳成安三縣去病政治獨爲稱首

北齊書兼北史列傳參廣

平府志

### 寇準

寇準字平仲華州下邽人年十九舉進士宋太宗初出知成安  
縣每期會賦役未嘗輒出符移惟具鄉里姓名揭縣門百姓莫  
敢後期累官至中書令贈萊國公謚忠愍

宋史列傳參廣平府志

劉仁

劉仁字寬夫順德平鄉人元至元間授成安尉和易近民贊令  
定差銀每以戶貧富高下爲則無纖毫冒濫以故招還避役民  
百餘戶時旱蝗有司開倉賑給仁監視照民甲乙其名斗斛公  
允秩滿去民攀留不得爲之立碑

陽成去思碑記  
參廣平府志

劉堯

劉堯南昌舉人明成化中令成安政善民孚逃者來歸益衆堯

乃立歸市近悅二社以處新附之民又闢小東門以便農作當時稱循良者必曰劉成安

畿輔通志參廣平府志

### 許汝進

許汝進河南睢州人辛酉舉人選授鉅鹿縣正德八年以廉能調知成安時流賊亂後歲歉民飢汝進號率下謹簿籍禁苞苴興學校撫流移減詞訟息盜賊理樹藝均賦則鄰封咸師之然骨體不附當道者遂被投劾公乃作自笑歌浩然而去民爲立墮淚碑於儀門之左

舊縣志

### 桂萼

桂萼字子實安仁人正德六年進士嘉靖初令成安

明史列傳

下車

詢問風俗知民間無蓄積而尙奢靡乃覈田畝減供需汰夫役  
釐弊剔蠹期於便民又闢小學設師儒以端蒙養每戒民勿輕  
訟鄰邑有疑獄久不決者多來質成片語析之兩造俱服擢南  
京刑部主事累官大學士謚文襄縣人與宋寇準並祀於仰功

祠

康熙志參  
廣平府志

### 章允賢

章允賢青陽進士嘉靖中令成安程士能釐吏蠹察民瘼均役  
以息勞寬征以省供平獄訟清剽寇復逋頗多善政擢禮科

給事中民思之爲立祠

王朝相建祠記  
參廣平府志

萬文彩

萬文彩臨安進士嘉靖中令成安廉正白持雅尙樸素敝履布袍蔬羹藿食澹如也其修廢舉墜卓有成績環城植柳數千株人呼曰萬公柳

廣平府志  
參舊縣志

### 王鈴

王鈴黃巖進士嘉靖中令成安性峭潔一介不取居官不攜妻子培植善良誅鋤豪右姦猾吏無敢逞其技者擢南京工部主

事

廣平府志  
參舊縣志

### 胡懋仁

胡懋仁臨海人任成安教諭好學誨人寒暑不輟諸生有婚喪不能舉者捐俸賙之學宮舊無名宦鄉賢二祠申請創建邑令

成安縣志

桂萼重其學行師事之

康熙志參廣平府志舊縣志

古時俊

古時俊博羅舉人嘉靖中任成安教諭敦崇德意以師道自嚴定章程勤督課崇雅黜浮文體士風翕然一變成邑科甲絡繹其遺澤也

廣平府志參舊縣志

李應德

李應德絳州人以明經任成安教諭著八行集十要規以教士捐俸供饌輸資濟貧士子束脩脯粟皆不受講解經旨詳駁文字豐贊數百言聽者豁然心解時稱博物君子

廣平府志參舊縣志

辛繼先

辛繼先襄城歲貢嘉靖中任成安訓導天資耿介課士修業卓有古風聞母訃卽日就道郡守怒其不辭使追還繼先正色語追者曰母子永訣五內如割何復能俯仰上官况教職非有司比乎卒不返郡守嘉其孝

廣平府志

柏正

柏正舒城舉人萬歷中令成安性嚴毅端謹豪強憚服民俗居喪多用妓樂修佛事正力禁之建四門橋勸農桑均徭賦革私

稅善政甚多

康熙志參  
廣平府志

李琯

李琯豐城進士萬歷中令成安邑自九年奉文括田頑民欺隱

成安縣志

多端遂至作奸者地浮於糧守法者糧浮於地害無已時琯申請丈量不數月盡除其弊邑人戴之

蔡可教丈田記  
參廣平府志

劉永脈

劉永脈延津拔貢萬歷中令成安以興廢起替爲任新學宮置祭器繕城垣建廟宇纂修縣志凡百善政俱標實績

廣平府志

李三畏

李三畏字敬甫長山舉人萬歷中令成安下車卽建文廟左右兩坊又置學田義塚築堤防立文社修縣志以年老乞休七上始允所著見著述門

廣平府志  
參舊縣志

馬珍

馬珍代州舉人萬歷中令成安修書院以造土築隄防以護城

輕徭薄賦緩征便民市井草莽同心愛慕升慶陽同知去民爲

立碑

郭佳鎮去思碑記  
參廣平府志

元之偉

元之偉字超凡萊蕪人天啟壬戌進士授成安令剛正不避權貴一時豪猾歛迹又申六諭興孝弟崇祀典簡鄉勇築隄防革火耗政多可傳以賢能調濬縣

廣平府志  
參舊縣志

彭希賢

彭希賢字耳知宜陽舉人天啟中令成安潭水逼城躬督夫役竭力捍禦設粥廠置藥局以救災民全活甚多又選士講武築

柵欄城堡以備不虞朔望親講鄉約舉善良葺文廟書院聚生徒以時訓課民安化治一時有循良之稱

康熙志參廣平府志舊縣志

### 韓守讓

韓守讓晉州人天啟初任成安教諭清介不阿喜讀書善獎勵督學歲試邢台令有庭杖諸生者衆忿激大譟於試院門學使者怒檄各學舉褫守讓堅不應曰功名有定數終不欲誣人以媚人也卒以此去官諸生爲立去思碑於明倫堂

廣平府志舊縣志

### 趙宋乾

趙宋乾河南進士崇禎中令成安有惠政邑人祠之

畿輔通志廣平府志參

### 李宗坊

李宗昉

趙原姓

項城拔貢崇禎中令成安當積弊難返之時振興

教化務裨益於民生修葺學宮創建樓堞立社學以訓迪生徒

一時人文蔚起士民德之至今

廣平府志  
參舊縣志

### 曹養鯢

曹養鯢字圖南蒲城舉人崇禎中令成安邑食鹽少而官引多往往散派里甲民以爲苦養鯢力請當事減之招撫流民勸課農桑遇歉歲煮粥賑濟御吏胥嚴無一敢舞文者自下車至升任野無差役之擾

廣平府志  
參舊縣志

### 陳熙

陳熙字貫生江寧舉人崇禎中令成安時值荒亂鄰境飢民擾

攘熙申明鄉約及保甲法練兵備禦邑卒無患除諸借派供應復修學宮至解帶以襄厥事

廣平府志

### 屠斯立

屠斯立字繼思漢陽舉人崇禎末令成安畿南屢祲焚掠無甯宇斯立至簡閱健卒復移鄰封爲合勦計先是邑之北鄙與肥鄉接壤肥鄉令郝綱文武才也北鄉民多歸焉綱爲發兵捕賊民德之於東北十二里許建報恩祠及斯立除書下綱喜曰繼思來賊可破矣及接移文卽日合兵大剿以計擒伏間有聽其自新者賊遂平

廣平府志  
參舊縣志

### 張世澤

張世澤汎水貢生崇禎末任成安訓導時丁改革之變縣無長吏人情鼎沸紳民請暫理縣事精明愷悌地方賴以安輯直指使及學使交章薦之升東安知縣

廣平府志參舊縣志

### 陳正已

陳正已字漆衲陝西富平舉人由廣文令成安性淳厚不事苛暴升京兆首邑

舊縣志

### 鄭一元

鄭一元義州人順治元年知成安縣值兵燹後地畝荒蕪請蠲租稅以里社徵派申作本戶正供部徵米豆改解折色又立官廐以養馬民累頓除有山東巨寇竄入邑境一元率數騎捕之

賊不敢犯

畿輔通志參廣平府志舊縣志

朱顯文

朱顯文濬陽人順治三年知成安縣比歲不登正賦孔棘諭民完納銀錢各便羨餘分毫不取訟者剖斷是非能改過卽免其罪每朔望詣學諄諭諸生以奉公守分勵學進修士民胥悅

廣平

府志參舊縣志

沈昇初

沈昇初字東生長洲舉人順治十二年知成安縣性明決人不敢欺值歲旱昇初語士民曰大旱不雨令不德也賦稅不完全不才也惟有投劾去耳聞者風動爭爲輸納勸農桑清獄訟審

編常例一切罷去升兵部主事

畿輔通志參廣平府志

### 張爍

張爍大興縣貢生順治十五年任成安教諭值漳水入城文廟俱圯爍捐金修葺規制一新立聚奎社與諸生杯酒論文娓娓不倦貧者佐以膏火遷常熟令去多士立碑於明倫堂右

廣平府志參舊

志縣

### 童煒

童煒祁州舉人順治十八年任成安教諭以立德存心爲訓文昌祠奎星閣久圯捐金重建又主觀社以課士人文日盛

廣平府志參舊

志縣

要胤昌

要胤昌

廣平府志因避清  
諱改運昌今復舊

字麟趾南和貢生康熙初補成安訓導光

露引人講經義酌古準今言下了然諸生貧者郤其束脩且資  
以膏火喪不能葬者助之捐俸修文廟漳水入城出錢數十貫  
募人決西北城放水全活甚衆厥功多焉

舊縣志

王公楷

王公楷

王公楷字本重潁州人順治辛丑進士康熙八年知成安縣鄰  
邑有告夫被殺者株連數十人公楷檄理之訪其里中自某死  
後有屠沽兒往外未歸卽命蹤跡捕之果得因姦殺死狀獄遂  
決縣苦漳水公楷請豁灘河地租晝夜行泥淖中率民築隄防

疏通畎澮水竟西徙以丁內艱歸

畿輔通志參廣平府志

### 黨振聲

黨振聲華州進士康熙二十七年知成安縣值歲荒設法勸輸全活甚衆邑人感其德祀仰功祠

廣平府志參舊縣志

### 王之儕

王之儕完縣舉人康熙中任成安教諭諸生進謁必以道義相規立麗澤社爲文會無間風雨卒於官門人爲立碑於明倫堂側

廣平府志

### 徐時作

徐時作建寧進士雍正七年知成安縣捐修學宮邑賦多缺額

時作清釐地畝令隱漏者以實自首正供既足派累悉除

畿輔通志參廣

平府志  
舊縣志

### 李日瑞

李日瑞字輯五吉水人雍正丙午舉人知成安縣先是成安連歲苦蝗民間有李公來或安安之謠及日瑞至民歡呼在道在任十年蝗不入境後四十年從姪蔚字若華復以乾隆乙酉舉人署成安凡日瑞所立政績悉整飭之蝗亦不入境人稱成安

### 縣令兩李公

廣平府志參  
吉水縣志

### 李聯璧

李聯璧字灌西瑞昌副貢知成安縣地當漳水之衝隄屢嚙決

聯璧相度形勢建小堤於上游河流底定大吏重之

廣平府志參  
瑞昌縣志

### 孫培曾

孫培曾拔縣舉人嘉慶三年知成安縣悃幅無華一以重民爲務公餘之暇網羅散失續修縣志以爲將來文獻之徵凡所興舉皆以實心行實政有古循吏風焉

廣平府志參成  
安續縣志序

### 趙庭椿

趙庭椿山陰監生道光二年知成安縣闢田疇實倉廩除疾苦清獄訟重修衙署移建倉厫自關帝廟文昌宮及祠宇以次興舉邑人稱之

廣平府志參  
查接撰碑記

### 楊昌江

楊昌江貴州天柱進士同治二年署成安縣時宋景詩作亂昌

江繕城垣捐鑄大礮噴筒登陴固守賊逼城知有備引去士民

獲安

畿輔通志參廣平府志

### 王蔭南

王蔭南字憩庵高陽舉人光緒四年授成安教諭下車後品學文章爲衆所推服本邑及鄰境拜門牆者踵相接十四年丁艱回籍喪葬畢成邑官紳信仰彌篤恭聘爲聯暉書院山長到院後課讀講解日有定時其講經尤深於禮記及左氏傳閱十餘年士子之蒙獎誘成材者不可勝數邑人景仰教澤思之至今

### 戚朝卿

戚朝卿字耀三貴州修文人光緒癸未進士己丑任成安甫下  
車輒觀風局門嚴試評定甲乙酌給膏獎舊日每月課期官齋  
各一次公遇九日別以五經文課士拔尤獎勵年餘文風不變  
是邑城鄉分三十二社每社設社書一名專司買賣田畝冊籍  
事賦役非所問也司牧以貧戶國課恒不易完輒令社書代完  
之名曰順社社書迫於勢勉從命繼復強迫貧戶便速完貧戶  
雖拮据萬狀必完納如數公知故甚憫之力矯順社弊而貧戶  
沾異恩矣公惡盜捕之有奇術一日黎明適縣試童軍入場點  
名畢聲言適磁有要公帶差役數十名出南門西行至林里堡  
忽南折入北魚營蓋大盜王九巢實窟於此出其不意擒之帶

至署寘之法凡蠹役害民公防之極嚴有鄉農涉訟者公知某役勒索得錢十餘緡上堂後公叱役使退還役知難隱詭言用已罄公令褫其裘使他役赴典質之得錢適如數遂還訟者時該役無上衣寒甚下堂後瑟縮僵疾趨出行過街市見者皆匿笑公片言折獄久播鄰封且聽訟時不禁觀聽某年十月值廟會公升堂問事觀者如堵忽一人仆案下公叱問何人曰磁人胡至此答言素知明府斷案如神未目睹今因事來成思於身親見之不料被衆擁擠仆案下乞寬恩公鑒其朴誠笑釋之又兩造搆訟隨問隨釋並不多押班房使受虐待以上所述皆昭昭在人耳目者公興利除弊保愛閭閻欲歷歷言之恐難更

僕數據父老傳聞前後百餘年間稱良令者當以公首屈一指焉治行爲全省第一其考語云廉明公正深洽輿情後累官至熱河民政長

張琨

張琨字君平雲南太和人清光緒甲午翰林辛丑任成安下車後好士愛民疾邪崇正一遵戚公約束財非應得一毫莫取可謂清矣事無苟且意少因循慎與勤又兼得之語云良令百里悅張公所爲庶不愧賢有司乎旋以捕景廷賓功調陞曲周去任時一車膏雨兩袖清風不及五六年又謁天津華宅充訓蒙學究烏乎前有郭魯堂後有張君平皆由仕而復學又皆見於

成安可謂後先輝映矣

### 石之璞

石之璞字琢卿汝陽縣人清光緒二十七年以剿捕拳匪功任成安縣事時經大亂之餘政綱不振之璞則痛抑邪教嚴捕盜匪境內以安厥後新政次第舉行一切興學校練警察講樹藝勸農桑築橋梁修道路洪纖畢舉井井有條尤可異者附城周圍及官道兩旁植柳數千株夏秋之交雨餘風定竟是綠楊城郭人稱石公柳焉越五年去任累官至保定警察廳長

### 張金鑄

張所長金鑄志遠其字也清豐縣人十五年春以陸軍連長補

任成安縣警察所長爲人性爽直有果斷雖目不識丁辦事手續却甚諳練會南北戰爭地方不靖某軍索糧要款某軍徵兵要槍張所長權其輕重應付裕如瞬息萬變之秋卒能履險爲夷大有其愚不可及之概成安毗連豫省時受匪患所長銳以戡平匪患爲己任一聞匪警不量敵強弱立卽出發馬步長警受其感化亦奮勉有加半年之間屢立奇功如勦獲匪人奪獲槍枝截留贓物等事不勝殫述旋于是一年七月十二日鐘樓寺突來土匪百餘名張所長聞報帶警卽發未候外區趕到竟行衝擊激戰一點餘鐘卒以衆寡不敵被匪包圍警士見事緊張環請退却張所長堅持不可向衆曰我一退全軍覆沒矣不如

汝等先退余一人殿後如獲全退更佳不然余一人卽死可活汝輩數十人也警士泣不從既而事益急所長厲聲曰宜速退勿遲疑否則盡死無益也警士不得已始退下張所長手持盒槍與匪對擊中數彈血流遮面猶直立不倚旋因鎗壞彈竭始擲槍於地曰天亡我也遂卒一時噩耗傳來咸爲淚下四鄉居民卽日遷避城內者數百家足見一般民衆平時均相依爲長城也

### 郭源順

郭源順江蘇徐州人充成安縣警察所剿匪助理員本亦間散職事該員顧名思義每次出發必束裝請隨十五年七月十二

日隨張所長出發在鐘樓寺與匪激戰彈貫腦部而亡亦有功  
於成民也故誌之

